



# ШЫН

НИИТИЛЕЛ-ПОЛИТИКТИГ СОЛУН

1925 чылдың  
август 31-де  
үнүп эгелээн

№ 44 (16502)

2002 чылдың  
АПРЕЛЬ 16,  
вторник

Ат салган шагы 21.30  
Садар өртээ 3 рубль.

## БОЛУУШКУННАР. КИЖИЛЕР. МЕДЭЭЛЕР

### Часка белеткел

Дүжүттүн бедик шынарлыгы хөрзүнүнү болбаазырадылгазындан, тарылга шөлдериниң үнүш-дүжүткүр каъдын экижиткенден улуг хамааржыр. Ынчангаш бо чылдын часкы чаштырылганы чагайжыдып чемишчиткен шөлдерге чорудары-биле хей чылдыг сизиниң, ооң иштинде донник азы мал чемиңге хереглээр үнүштүн үрезиниңге чагыгны юмрген.

Эң-не эвээш дизе-ле, баштайгы удаада биске 600 тонна минералдыг чемишчидилге негеттинип турар. Ону Череповец хоорайда минералдыг чемишчидилге бүдүрүп турар «Аммофос» акционер ниитилелден 2 млн. 875 муң рубль-биле садып алып. Үрезин хораннаарыңга 3 млн. рубльге 9 тонна пестицид хереглеттинип турар. Ооң-биле чергелештир бо чылдың часкы хову ажилдарыңга 816 тонна дизтопливо, 139 тонна бензин, 48 тонна машина үзү, ниитизи-биле 8 млн. рубльге кывар-чаар материал негеттинип турар.

Тараа культураларын тарырыңга белеткээн 16,5 муң гектар шөлдүн 11,6 муң гектары С.Шойгу аттыг күрүнениң «Балгазын» каттышкан бүдүрүлгезинге болгаш «Кызыл тараачын» коллективтиг бүдүрүлгеге хамааржыр. Улуг-Хем кожуунун ажил-агыйларында база «Центральная» машина-техниктиг станцияда 1000 гектар. Арткан Чөөн-Хемчик, Чаа-Хөл, Кызыл кожууннарның коллективтиг бүдүрүлгелери 2002 чылдың дүжүдүңгө чайгы чер аңдарылгазын багай чоруткан. Ынчангаш кедээ ажил-агый продукциязының бүдүрүкчүлери кыска үениң иштинде ам-даа 23,5 муң гектар шөлге часкы аңдарылганы чорудар.

Бистиң корр.

### АМ-ДАА ХЕВЭЭР

Улуг-Хем кожуунун Шагаан-Арыг хоорайда кудумчуларның аттарын, эде адаан кудумчуларның аттарын бижээн бижиктерни солуур талазы-биле ажилдар ам-даа чоруттунмаан. Чижээ: Промышленная кудумчун Кудажы аттыг кылдыр эде адаанда болза, паспорттарда ам-даа эрги ады-биле бижип турар. Удавас, апрель 27-де, маңаа, Шагаан-Арыгта, кожуун чагырга даргазының болгаш хоорай чагырга даргазының сонгулдалары болур. Бо чедир кылдынмаан ажилдар девискээр сонгулда комиссиязының, сонгулда участоктарының ажилыңга бергедээшкннерни таварыштырып турар.

### Үрезин

Улуг-Хем кожуунун кедээ ажил-агый эргелелиниң начальниги Светлана Даргановна Кууларның дыңнатканы-биле алырга, бо чылдын 3850 гектар шөлге тараа культураларын тарыыр деп планнап турар. 477 тонна тараа үрезини херек, а кожуунда амгы үеде 224 тонна тараа үрезини бар, ооң 18 хуузу боктан арыглаттынмаан. 253 тонна тараа үрезинин болгаш 70 тонна картофель үрезини тывар ажилдар чоруттунуп турар болгаш чер ажилын экижидери-биле «2002-2005 чылдарда мелиорацияны сайзырадыры» деп программаны кожуун чагыргазы хүлээп алган.

### Практика

Дүүн, апрель 15-те, ТКУ-нун бойдус-география факультетиниң студентилери Абакан хоорайже практика эрктирип аъттанышкан.

Олар алюминий заводунга, АЭС-ке баргаш, молибден бүдүрериниң дугайында өөренирлер. 18 кижиде составтыг бөлүктү куратору Лориса Лопсановна Куулар удуртуп чоруур.

### Аът чарыжы

Апрель 12-де Чөөн-Хемчик кожуунун Чыргакы сумузунга аът чарыжыңга республика чергелиг маргылдаа болуп эрткен.

180 аът киришкен бо маргылдаага Улуг-Хем кожуунун Торгалыг сумузундан Сергей Шагжының ады мурнап келген.

### Мөөрей

Сукпак ортумак школы – республиканың шыырак школаларының бирээзи. Ынчангаш «Чылдың башкызы» мөөрейниң маңаа тиелекчизи чүгле кожуун мөөрейинге эвес, а харын республика мөөрейинге база шылгарай берзе хөңнү. Чоокта чаа Сукпак школазыңга болган бо мөөрейге даштыкы дыл башкызы Аяна Болатооловна Хомушку тилээш, кожуун мөөрейинге киржир эргени алган.

Айлаң ДАРЖАА.

### Шыдыраа

Апрель 5-7 хүннеринде ТКУ-нун физика-математика факультетиниң шыдыраага ажык маргылдаазы болган. Аңаа төөгү факультетиниң студентизи Маадыр Даштай тиилээн.

### Бот-өөредилге салбыры

Апрель 15-тен май 12-ге чедир ТКУ-нун бот-өөредилге салбырынче документилерни хүлээп ап эгелээн.

### Чагаадан одуруглар

Бистиң № 23 уруглар садының өске ыңдыг школа назыны четпээн уруглар албан черлеринден ылгалы чүдел дизе, мында инвалид уругларны ажаап-тежээп, кижизидип турар. Ындыг уругларны кижизидериниң арга-хоргалары бир янзы, колдуунда оюн-тоглаа дамчыштыр чоруттунар. Ынчангаш бистиң шаг-шагдан бээр кол бергеделип келген айтырыгларыбыстың бирээзи янзы-бүрү ойнаарактар-биле четчеленири турганы чугаажок. Эрги ойнаарактар-биле уруглар ойнаксапас, а чаа ойнаарактар садып алып дээривиске, акша-хөргивис чок болуп келген.

Бо талазы-биле деткикчилер дилеп кайнаар четпээн, кымнарга кирбээн дээрил. Инвалид уругларга дузалажыкы дег организация-даа, кижилер-даа тыппаан бис. Ынчалза-даа буянныг кижилер чырык чер кырында ам-даа бар дээрзинге база катап бүзүрээр аргалыг болдувус. «Енисей» таксиниң удуртукчулары Эдуард Александрович биле Ирина Борисовна Афанасьевтер бистиң дилээвисти сагыш човаашкынныг хүлээп көрүп, саңхөө деткимчезин көргүзүп, бистиң кижизиттирикчилеривиске ойнаарактарны садып бердилер. Оларга өөрүп четтиргенивисти илереттивис. Пассажирлер аргыштырып турар машина-балгадынарның чоруу ылгын, а боттарыңарның ажил-херээнер чогуңур болзун деп оларга күзээр-дир мен.

Ольга КЮЕВА,

№ 23 уруглар садының директору.

### Мал оолдаашкыны – 2002

Бо чылдың апрельдин бирги декадазы-биле алырга, республикада кедээ ажил-агый өнчүзүнүн бүгү хевирлеринде төрүүр 45719 инектиң 42555-и төрүпкен. Тандыда төрүүр инек 2306, ооң 610-у төрүпкен. Бий-Хемде – 1882, 539 инек төрүпкен. Чөөн-Хемчик кожуунун кедээ ажил-агый өнчүзүнүн бүгү хевирлеринде төрүүр инек бажы 4028. Ооң иштинде 454 инек төрүпкен.

Шээр мал оолдаашкыны ам-даа уламчылавышаан. Кедээ ажил-агый бүдүрүлгелеринде 180 муң чаш хураган камгалап алдыңган. Өнчүнүн өске хевирлеринде анай-хураган бажы чээрби муң ашкан. Мал оолдаашкыны уламчылавышаан.

### Хүндүлүг номчукчулар! Республиканың амыдыралыңдан чыда калбас дизиңерзе, «Шын» солунну чагыдып алыңар!

**ЧАГЫДЫЛГАНЫҢ ӨРТЭЭ:** хууда чагыдыкчыларга 2002 чылдың ийиги чартыбында 185 рубль,  
3 айда – 93,  
1 айда – 31 рубль.  
Организацияларга  
6 айда 238 рубль,  
3 айда – 119 рубль,  
1 айда – 40 рубль.

Чартык чылда хууда чагыдыкчыларның төлээри 185 рубльден редакцияга 70, солуннарны чедирери дээш почта черинге 115 рубль кирер. Организацияларның чартык чылда чагыдылганыңдан редакцияга 100, почта черлеринге 138 рубль кирерин билип алыңар.

Экспресс-чагыдылганы неделяның кайы-даа хүнүнден эгелеп чагыдып ап болур силер.



«ШЫН» солунунуң шаңналы дээш Ада-чурттун Улуг дайыныңга төөгүлүг Тиилелгениң 56 чыл ою чоокшулап олар.

Ооң-биле холбаштыр «Шын» солунунуң шаңналы дээш чыл бүрүде эртер ТЫВА ХҮРЕШ маргылдаазын аарыкчылар, көрүкчүлөр четтикпейн манап турары чугаажок.

Бо улуг байырлалга тураскааткан тыва хүреш маргылдаазы

МАЙ 9-та хүндүскүнүн 13 шакта ТЫВАНЫҢ 5 ЧЫЛЫ АТТЫГ СТАДИОНГА эгелээрин солунунуң редакциязы дыңнадып тур. Аңаа республиканың кожууннарның болгаш найысылалдың эң шыырак мөгелери киржир.

Деткикчилерни «ШЫН» солунунуң редакциязында манап тур.













